

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U LUKAVCU
Broj: 126-0-Su-24-000 230
Lukavac, 30.04.2024.godine

Na osnovu člana 31. stav 2. Zakona o sudovima u Federaciji Bosne i Hercegovine („Službene novine Federacije Bosne i Hercegovine“, broj: 38/05, 22/06, 63/10, 72/10, 7/13, 52/14 i 85/21), člana 8. stav 1. tačka j. Pravilnika o unutrašnjem sudskom poslovanju („Službeni glasnik BiH“, broj: 66/12, 54/17, 60/17, 30/18 i 83/22), Uputstva za anonimizaciju („Službeni glasnik BiH“, broj: 25/24) i Smjernica Visokog sudskog i tužilačkog vijeća Bosne i Hercegovine za objavljivanje sudskih i tužilačkih odluka, akata i informacija o predmetima, broj: 07-02-3-1279-3/2024 od 21.03.2024.godine, Predsjednica Općinskog suda u Lukavcu, dana 30.04.2024.godine, donosi:

PRAVILNIK

o načinu objavljivanja sudskih odluka, akata i informacija o predmetima
na službenoj web stranici Općinskog suda u Lukavcu

Član 1.

(Uvodne odredbe)

Ovim pravilnikom uređuje se način objavljivanja sudskih odluka, akata i informacija o predmetima na službenoj web stranici Općinskog suda u Lukavcu (u daljem tekstu: Suda).

Predsjednik suda ili postupajući sudija će odluke ili informacije o predmetu koje namjerava objaviti na službenoj web stranici suda elektronskom poštom ili na drugi adekvatan način dostaviti uređivačkom tijelu koje je zaduženo za njihovu anonimizaciju i objavu na službenoj web stranici Suda, prilikom koje dostave će naznačiti uređivačkom tijelu broj predmeta, pravnu oblast, podoblast, kratak opis pravnog instituta, vrstu i predmet spora, da li se radi o odluci od javnog interesa, odluci od značaja za sudsku praksu, odluci u kojoj postoji zakonska obaveza objavljivanja, odluci za koju je iskazano interesovanje profesionalne, akademske zajednice, medija i javnosti, te druge elemente koji su od značaja za objavu odluke ili informacije.

Predsjednik suda će u roku od 3 dana od dana stupanja na snagu ovog Pravilnika, donijeti odluku o uspostavljanju uređivačkog tijela i imenovanju tehničke podrške za objavljivanje sudskih odluka, akata i informacija o predmetima na službenoj web stranici Općinskog suda u Lukavcu.

Član 2.

Na službenoj web stranici Suda objavljivati će se pravosnažne sudske odluke, te informacije o predmetima u toku, na način koji je jasan i razumljiv javnosti i medijima.

Trajanje objave sudske odluke će biti ograničeno do godinu dana, osim ako svrha objavljivanja ne zahtijeva duži vremenski rok, sa primjerenim stepenom anonimizacije u skladu sa Smjernicama i Uputstvom za anonimizaciju Visokog sudskog i tužilačkog vijeća BiH.

Pravosnažne sudske odluke objavljivati će se u posebnoj sekciji web stranice u modulu „Sudske odluke“, gdje će se prilikom objavljivanja sudskih odluka, a radi njihove preglednosti, iste razvrstati po oblastima i pravnim terminima sa minimumom podataka koje treba obezbijediti i to:

- u krivičnim predmetima: naziv krivičnog djela, broj predmeta i kratki opis pravnog instituta,
- u građanskim predmetima: podoblast, vrstu i predmet spora, broj predmeta i kratak opis pravnog instituta.

Informacije o predmetima u toku, uključujući i informacije o nepravosnažnim odlukama objavljivati će se u formi saopštenja za javnost u kategoriji pod nazivom „Odnosi sa javnošću“, podkategoriji „Vijesti“, sekciji „Saopštenja za javnost“, dok se u već postojećoj sekciji „Aktuelnosti“ objavljuju isključivo informacije o redovnim aktivnostima suda i opšte informacije.

Izuzetno, u predmetima od javnog interesa, uz saopštenje za javnost kojim se daje informacija o nepravosnažnim odlukama, može se objaviti i izreka odluke u pdf formatu.

Putem Saopštenja za javnost mogu se objaviti informacije i o pravosnažnim sudskim odlukama, s tim da će integralni tekst pravosnažne odluke javnosti biti dostupan putem linka koj će upućivati na sekciju „Sudske odluke“.

Na sve ostale dokumente Suda koji se po zakonu objavljuju na oglasnoj tabli suda, u službenim glasnicima ili dnevnim novinama, ne primjenjuju se odredbe ovog pravilnika i ti se dokumenti mogu neanonimizirani objaviti na web stranici suda po odobrenju predsjednika suda ili postupajućeg sudije.

Uz sve informacije i odluke iz krivičnih predmeta koje se objavljuju do pravosnažnosti presude potrebno je objaviti i napomenu o načelu presumpcije nevinosti: „Potvrđivanje optužnice ili donošenje nepravosnažne odluke protiv određene osobe ne znači da je ta osoba zaista kriva i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo, dok se pravosnažnom presudom ne utvrdi njegova krivica“.

Član 3.

Objava pravosnažnih sudskih odluka, za koju objavu postupajući sudija u dogovoru sa predsjednikom suda tako procijeni, vršiti će se prema sljedećim kriterijima:

1. Odluke od javnog interesa;
2. Odluke od značaja za sudsku praksu;
3. Odluke u kojima postoji zakonska obaveza objavljivanja;
4. Odluke za koje je iskazano interesovanje profesionalne, akademske zajednice, medija i javnosti;
5. Druge odluke koje po procjeni suda imaju prioritet u objavljivanju.

Predmeti od javnog interesa su:

Krivični predmeti:

- koruptivna krivična djela definisana listom koruptivnih krivičnih djela VSTV-a BiH,
- organizovani kriminal,
- pranje novca,
- krivična djela u vezi sa utajom poreza, trgovina ljudima, porodično nasilje, krivična djela u vezi sa neovlaštenom proizvodnjom i prometom opojnih droga,
- krivična djela iz mržnje,
- krivična djela protiv države i društvenog uređenja,

Parnični predmeti:

- diskriminacija,
- zaštita okoliša,
- rodna ravnopravnost,
- zaštita potrošača,
- kolektivni sporovi,
- sporovi o državnoj imovini,

odnosno, predmeti za koje se procijeni da su od javnog interesa rukovodeći se sljedećim kriterijima:

1. Vrsta i težina krivičnog djela kao i predmet postupka,
2. Svojstvo učesnika u postupku (npr. imenovani/izabrani dužnosnici u sudskoj, izvršnoj i zakonodavnoj vlasti, novinari, službena lica, javna lica i sl.)
3. Ostali opravdani interesi javnosti (npr. stepen društvene opasnosti, pojavni oblik kriminaliteta, zaštićeno dobro, značaj odluke za širu društvenu zajednicu i sl.)

Sud će javnosti redovno pružati informacije o toku postupka u predmetima od javnog interesa do njihovog pravosnažnog okončanja.

Odluke od značaja za sudsku praksu su:

- a) odluke u kojima je sud prvi put zauzeo neki stav (primjena novih zakona, novi instituti, odluke u pilot predmetima, odluke o spornom pravnom pitanju...),
- b) odluke u kojima je promijenjen ranije zauzeti stav istog suda, uključujući i odluke u kojima je sud promijenio shvatanje zbog odluke Evropskog suda za ljudska prava ili Ustavnog suda BiH,
- c) odluke koje se odnose na nove pravne lijekove,
- d) odluke u kojima je sud direktno primijenio Evropsku konvenciju za zaštitu ljudskih prava i osnovnih sloboda ili koristio sudsku praksu Evropskog suda za ljudska prava ili drugog međunarodnog tribunala,
- e) odluke u kojima je sud primijenio međunarodni ugovor (npr. Bečka konvencija),
- f) odluke u kojima se sud pozvao na stav panela za ujednačavanje sudske prakse,
- g) odluke u kojima je dozvoljena vanredna revizija,

odnosno odluke koje prema ocjeni Suda mogu biti u interesu za stručnu zajednicu i praćenje razvoja sudske prakse u okviru njegove nadležnosti u krivičnim i građanskim stvarima.

Član 4.
(Podaci koji se anonimiziraju)

Sudske odluke koje se objavljuju na web stranici anonimiziraju se tako što se:

- 1) Anonimiziraju podaci o fizičkom licu koje u postupku učestvuje kao:
 - a) Stranka i drugi učesnik u postupku: osumnjičeni, optuženi, oštećeni, žalilac, tužilac, tuženi, umješač, revident, ostavilac, nasljednik, izdržavalac, svjedok i slično,
 - b) Punomoćnik stranke - koji se u postupku pojavljuje kao: osoba ovlaštena za zastupanje stranke ili pravnog lica, te advokatski/notarski saradnik i pripravnik,
 - c) Zakonski zastupnik stranke,
 - d) Službena osoba zaposlena u državnom organu, ustanovi, udruženju, pravnom licu: socijalni radnik, psiholog, pedagog, defektolog, doktor, itd.
- 2) Od podataka o pravnom licu anonimiziraju se identifikacioni broj (ID) i PDV broj kao i povjerljivi podaci koji mogu ugroziti njihov komercijalni interes (poslovne knjige, tovarni list, brojevi računa i sl.).

Član 5.
(Način anonimizacije)

Podaci koji se anonimiziraju su:

1. Ime i prezime i nadimak fizičkog lica,
2. Datum i mjesto rođenja,
3. Adresa prebivališta/boravišta,
4. Jedinствeni matični broj – JMB,
5. Broj lične karte, pasoša, vozačke dozvole, broj polise osiguranja, broj bankovnog računa, broj registarske oznake vozila i broj šasiје, te brojevi ostalih ličnih dokumenata,
6. Brojevi dokaza u predmetima ratnih zločina (ERN broj) i brojevi vojne pošte (VP),
7. Broj telefona,
8. E-mail adresa, URL/web adresa,
9. Oznake katastarskih općina,
10. Drugi podaci koji sa sigurnošću mogu dovesti do identifikacije fizičkog lica ili službenog lica čiji je identitet zaštićen posebnim propisima (npr. zdravstveno stanje, fizičke karakteristike i sl.)

Podaci se anonimiziraju na taj način da se ispuštaju i zamjenjuju inicijalima i tačkama u skladu sa Uputstvom za anonimizaciju („Službeni glasnik BiH“, broj: 25/24), pri tome vodeći računa da se i daljom obradom anonimiziranog podatka zajedno sa drugim dostupnim podacima ne može utvrditi identitet te osobe.

Podatak koji se stavlja u anonimnost ne stavlja se pod navodne znake, osim nadimaka, pseudonima i sl., koji su u odluci koja se anonimizira stavljeni pod znake navoda.

Član 6.

(Podaci koji se ne anonimiziraju)

Ne anonimiziraju se podaci o : sudovima; sudijama/članovima sudskog vijeća koji donese odluku u vijeću, sudijama porotnicima i zapisničarima; advokatima (advokatsko društvo) kao punomoćnici stranke, notarima u postupanju u skladu sa notarskim ovlaštenjima; sudskim vještacima; sudskim tumačima i prevodiocima; pravobraniocima i zamjenicima pravobranilaca; ostalim pravosudnim organima i njihovim predstavnicima; upravnim organima-policijska uprava; državnim organima i njihovim predstavnicima; gradskoj i lokalnoj upravi i njihovim predstavnicima (kanton, grad, općina i sl.); javnim preduzećima i njihovim predstavnicima (gradsko, općinsko, kantonalno i državno); pravnim licima (osim podataka iz člana 4. stav 2. ovog Pravilnika); javnim ustanovama i njihovim predstavnicima; međunarodnim organizacijama; nevladinim organizacijama; sindikatima; nazivi zakona, pravilnika, statuta, kolektivnih ugovora i drugih opštih akata; nazivima predmeta koji sadrže lične podatke optuženog/osuđenog (npr: u predmetu „Marković i drugi“); podaci iz zemljišnih knjiga i katastra (brojevi zk. uložaka, zk. čestica, posjedovnih listova, katastarskih čestica i sl.) osim podatka iz člana 5 stav 1, tačka 9; posebna kategorija ličnih podataka ako čine obilježja bića krivičnog djela.

Član 7.

(Objava podataka u odlukama od javnog interesa)

Ukoliko predsjednik suda ili postupajući sudija ocijeni da je to u javnom interesu, može objaviti ime, prezime, nadimak, godinu i mjesto rođenja osumnjičenog/optuženog/oslobodenog u krivičnom postupku, odnosno ime i prezime stranaka u građanskom postupku, dok se ostali lični podaci precizirani u članu 5. stav 1. ovog Pravilnika anonimiziraju.

U situaciji kada se otkrivaju navedeni podaci, potrebno je voditi računa da se zaštite posebne kategorije ličnih podataka kao rasno porijeklo, nacionalno ili etničko porijeklo, religijsko uvjerenje, zdravstveno stanje, seksualni život i dr. osim u slučaju kada ti podaci čine biće krivičnog djela ili su neophodni za razumijevanje objavljenog sadržaja.

Lični podaci iz stava 1. ovog člana će se anonimizirati kada se ispuni svrha objave, a u krivičnim predmetima najkasnije kada nastupe uslovi za brisanje osude.

Član 8.

(Saglasnost nosioca podataka)

Neće se anonimizirati podaci o licu koje je dalo izričitu saglasnost za objavljivanje ličnih podataka.

Za pribavljanje saglasnosti za obradu ličnih podataka fizičkih lica, Sud će po mogućnosti prilikom prvog kontakta učesnika sa sudom, a najkasnije do okončanja prvostepenog postupka, istom predočiti obrazac za potpisivanje saglasnosti za obradu ličnih podataka (obrazac saglasnosti za obradu podataka ja sastavni dio ovog Pravilnika).

Osoba čiji se lični podaci objavljuju ima pravo da od suda, u roku od 15 dana, dobije informaciju o tome, kao i pravo da zatraži izmjene, brisanje ili dopunu netačnih/nepotrebnih podataka koji se na nju odnose, a u svjetlu prava na zaborav. O osnovanosti ovakvog zahtjeva odlučuje predsjednik suda.

Član 9.
(Ispuštanje dijelova teksta)

U slučajevima kada je radi zaštite ličnih podataka iz sudskih odluka i akata potrebno ispustiti dio teksta, to će se izvršiti na način što će se taj dio teksta izbrisati i zamijeniti sa oznakom „(...)“, a u slučaju izostavljanja cijelog pasusa zamijeniti sa oznakom „[...]“.

Član 10.
(Dosljednost pri anonimizaciji)

Prilikom anonimizacije imena fizičkih osoba voditi će se računa o dosljednoj anonimizaciji na taj način da će se od početka do kraja odluke sa istim inicijalima odnosno oznakama označiti osobe, bez obzira na to što je eventualno u odluci u tekstu mijenjan redoslijed pisanja imena i prezimena ili navedeno samo ime, prezime ili nadimak, a očito je da se radi o istoj osobi.

Kada postoji dilema da li neki podatak anonimizirati, a radi se o podatku koji nije neophodan za razumljivost odluke, takav podatak će se anonimizirati.

Član 11.
(Ostale odredbe)

Lični podaci djeteta i svake osobe mlađe od 18 godina ne mogu se objaviti i moraju biti zaštićeni tokom cijelog postupka bez obzira na status te osobe u konkretnom postupku.

Član 12.

Uz objavljenu sudsku odluku, gdje god je to moguće, potrebno je navesti poveznicu na sa njom povezane odluke višeg suda po žalbi.

Član 13.

O svim žalbama i izjašnjenjima na žalbe može se objaviti kratko saopštenje, sa informacijama o tome da li je i kada podnesena žalba, na koju odluku i kojem sudu.

Član 14.

Pravosnažne odluke koje se objavljuju na web stranici istovremeno se dostavljaju i Visokom sudskom i tužilačkom vijeću Bosne i Hercegovine - Odjelu za sudsku dokumentaciju i edukaciju u word formatu u anonimiziranoj formi i to uz prateći obrazac (obrazac za indeksaciju sudskih odluka koji je sastavni dio ovog Pravilnika), a radi njihove trajne pohrane u centralnoj Bazi sudskih odluka.

Član 15.
(Izmjene i dopune)

Izmjene i dopune ovog Pravilnika donose se na način i po proceduri predviđenoj za njegovo donošenje.

Član 16.
(Stupanje na snagu)

Ovaj pravilnik stupa na snagu danom donošenja i biće objavljen na web stranici Suda.



DOSTAVLJENO:

- Sudije Općinskog suda u Lukavcu,
- Uređivačko tijelo,
- Tehnička podrška,
- Visoko sudsko i tužilačko vijeće Bosne i Hercegovine,
- Radna grupa VSTV-a BiH za analizu i unapređenje objavljivanja sudskih i tužilačkih odluka,
- A/A.

OBRAZAC SAGLASNOSTI ZA OBRADU PODATAKA

OPĆINSKI SUD U LUKAVCU

Broj predmeta: _____

Datum: _____

SAGLASNOST ZA OBRADU PODATAKA

Ja, _____ iz _____
(Ime, ime jednog roditelja, prezime)

Nakon što sam upoznat/a sa mogućnošću da moji lični podaci ¹ mogu biti dostupni javnosti u slučaju objavljivanja sudskih odluka, akata i informacija o predmetu na specijaliziranim web servisima pravosudne institucije ² i poučen/a o pravu da u svakom trenutku mogu podnijeti zahtjev za brisanje/anonimizaciju/uklanjanje svojih ličnih podataka,

potvrđujem da sam saglasan/saglasna da se u ovom predmetu mogu obrađivati moji lični podaci dok se ne ostvari svrha njihovog objavljivanja ³

¹ Lični podaci, u smislu odredbe člana 3. Zakona o zaštiti ličnih podataka BiH („Sl glasnik BiH“, br. 49/2006, 76/2011 i 89/2011 - ispr.) podrazumijevaju bilo koju informaciju koja se odnosi na fizičko lice koje je identifikovano ili može da se utvrdi identitet lica.

² Službene web stranice pravosudnih institucija, centralna Baza sudskih odluka BiH, Portal sudske prakse Bosne i Hercegovine i Mapa sudskih predmeta od javnog interesa.

³ Svrhu objavljivanja sadržaja na specijaliziranim web servisima u kojima su otkriveni lični podaci fizičkih lica, kontrolor podataka cijeni u svakom konkretnom slučaju.

OBRAZAC ZA INDEKSACIJU SUDSKIH ODLUKA

NAZIV SUDA	
BROJ PREDMETA	
SENTENCA (Pravni stav izražen u odluci popunjava se ukoliko odluka ima sentencu)	
PRAVNA OBLAST	
KLJUČNE RIJEČI ZA PRETRAGU/ DESKRIPTORI	
PRIMJENJENI PROPIS - naziv propisa, broj člana i broj(evi) službenog glasila u kojem je propis objavljen -	
VEZANE ODLUKE - broj(evi) predmeta i naziv suda koji je donio odluku -	

Pripremio/la: